

Amor pa Plaka

Ora Henrietta Garrett, un biuda di 81 un aña a fayedé na aña 1930, el a laga \$17 mion, un suma grandi pa e era ei. Ma e no tabatin tètament. Ora el a muri, e tabatin ún achte prima so i ménos ku 12 amigu. Ma diripiente 26.000 hende na 29 pais—representá pa 3000 abogado—a purba proba ku nan ta famia pa nan por haña parti di e erensia. Algun di nan a kambia nòmber, kambia registro di famia, a bin ku storia ku nan ta yu djafó, èts. Komo resultado di tur e trasteria, 12 persona a haña but, dies a kai será, tres persona a wòrdú asesiná, i dos a kometé suisidio.

Den tur era i tur rango sosial, **set pa sèn ta e motivashon (skondí òf abierto) tras di tur klase di maldat.** No ta pa kasualidat ku dos di e Dies Mandamentunan ta trata ku hende su relashon pa ku kos material: “*no hòrta*” i “*no kudishá*”! Dios a enfatisá esaki nètamente pasobra amor pa plaka ta kousa tantu problema. Beibel ta bisa “*Boso ta kudishá i boso no tin; pesei boso ta mata. I boso ta envidiá i no por haña; pesei boso ta bringa i pleita*” (Santiago 4:2). “*..amor pa plaka ta rais di tur sorto di maldat...*” (1 Timoteo 6:10). Pensa un rato di algun daño kousá pa e “enfermedat maligno” aki:

1.) Amor pa plaka ta dañá hopi relashon inter-personal. Un di e motibunan prinsipal ku parehanan ta divorsíá ta pa motibu di asuntonan finansiero. Kuantu problema familiar ta okashoná pa e malditu weganan di plaka. Rumannan ta keda rabiá ku otro pa motibu di plaka.

I set pa sèn ta kousa problema riba un eskala mas grandi. Tantísimo kaso dilanti hues tin su rais den sèn. Bastante hende ta kita di trabou—asta bon trabou—deseando mas entrada. Kuantu biaha empleadonan ta wèlga pa haña mas sèn. Hopi guera ta bringá pa motibu di golosidat.

2.) Amor pa plaka ta produsí desatesfakshon. Dios ke pa bo tin un aktitut di satesfakshon ku loke bo tin. “*I si nos tin kuminda i paña pa bisti, ku esakinan no mester ta kontentu*” (1 Timoteo 6:8). Ta mas kla ku di dia ku bo no por tin un aktitut di satesfakshon i set pa sèn pareu.

Tantu hende ke sa ku plaka por hasi nan kontentu. Ma esei no ta bèrdat. Ora a puntra un hòmber riku kuantu sèn e mester tin pa e ta kontentu, el a respondé, “Un dòler mas.” Ora bo ta haña e 1 florin adishonal, bo ke 1 mas! Nos nunca ta kontentu ku loke nos tin. Muchanan ke mas kos di hunga. Hóbennan ta kudishá e Nike di otro. Adultonan ta deseá e luhonan di bisiaña.

Sigur e propaganda ku nos ta mira i tende ta promové un aktitut di kudishi.

Nos tin ku siña ku sèn no por satesfasé. Ryle a skirbi: “Plaka di berdat ta un di e poseshonnan ku no ta satesfasé. Sin duda, e ta kita algun preokupashon; ma e ta trese huntú ku ne mes tantu preokupashon ku e ta kita. Tin e difikultat pa hañ’é. Tin pre-okupashon pa keda ku ne. Tin tentashon pa us’é. Tin sintimentu di kulpabilidat ora ta abusa di dje. Tin tristesa ora ta perd’é. Tin konfushon kon pa deshasí di dje.”

3.) Amor pa plaka ta dañá bo relashon ku Dios. Hesus a bisa bon kla, “*Ningun hende no por sirbi dos shon; pasobra òf e lo odia esun i stima e otro, òf e lo ta leal na esun i despresiá e otro. Boso no por sirbi Dios i rikesa*” (Mateo 6:24). Echu ta, bo LO sirbi un shon...pero bo NO por sirbi tur dos pareu! Un hende ku ta stima plaka no ta un bèrdadero siguidó di Kristo. **Amor pa plaka i amor pa Dios no por sinta riba e mésun trono di bo bida. Bo tin ku skohe un òf e otro...konsientemente!**

Evalúa bo mes. No ta hende riku so ku por stima sèn. Set pa sèn fásilmente por bira e motivashon sekreto di e persona mas amabel, mas onesto, mas religioso. Bo por gaña tur hende... inkluiendo bo mes. Ma bo no por gaña Dios. Di bèrdat, kontinuamente bo tin ku evaluá si bo ta motivá pa amor pa plaka.